

Den su reaccion tocante e uitvoeringsrapportage CAft ta destaca cu e maneho financiero no ta na ordo ainda

Na fin di november Colegio di Supervision Financiero (CAft) a manda su reaccion riba e uitvoeringsrapportage (UR) pa e di dos kwartaal di 2024 pa minister demisionario di Finanzas, Xiomara Maduro.

Riba 18 di november 2024, CAft a ricibi e UR di Aruba pa e di dos kwartaal di 2024. Dia 28 di november CAft a manda su reaccion pa minister Maduro den cual nan ta duna un splicacion mas amplio tocante nan reaccion,

Primeramente CAft a remarca cu e maneho di presupuesto cauteloso ta dunando su fruto. Nan a splica cu a base di e di dos UR ta muestra cu Aruba ta cumpli ampliamente cu e standardnan pa e saldo di financiamiento y pa e proporcion di debe. Nan ta sigui splica cu e saldo di financiamiento ta basa riba e cifranan aki te hasta 3.9% di e GDP. Esaki, CAft ta destaca, ta satisface e requisito di compensacion di deficit.

Nan ta agrega tambe cu por lo pronto gobierno demisionario a cumpli cu e norma di gastonan di personal. Sinembargo, CAft ta señala, cu e UR no ta duna un bista actualisa riba e situacion financiero y economico di Aruba avor cu e UR a bolbe ser entrega despues di e deadline legal.

Puntonan importante di atencion cu e Consejo ta destaca cu ta keda ta e gastonan halto di interes y e gastonan di interes significativo cu ta spera e sub-agotacion di e presupuesto di inversion. Nan ta subraya cu ta imperativo pa Aruba sigui traha riba alivia e peso di interes. CAft ta resalta cu un agenda di inversion di varios año ta necesario pa logra uso efectivo y eficiente di e recursonan di inversion reserva.

Den su reaccion CAft ta pidi pa gobierno cumpli cu algun punto. Como primer punto nan ta pidi pa gobierno demisionario provee e di tres UR mas pronto posibel y e resultado presupuesta di e sector colectivo den e di dos amienda di presupuesto adopta (BW) 2024 basa riba e cifranan di realizacion mas recien.

E Consejo ta pidi tambe pa inclui un diferenciacion di e



debe di e sector colectivo den e di tres UR.

Ademas nan ta pidi pa pone atencion explicito na e desaroyo multi-anual di gastonan di personal relaciona cu e norma y di e relacion di debe di e sector colectivo.

Di cuater punto cu CAft ta pidi ta pa yega na un programa di maneho di riesgo di presupuesto adecua cu ta inclui e riesgonan integralmente den e presupuesto y den e rapportnan di implementacion.

Por ultimo e Consejo ta pidi pa promove e eficiencia y efectividad di inversionnan pa medio di esaki trahando pa implementa un agenda di inversion di varios año.

Pa loke ta e saldo di financiamiento CAft ta splica cu e saldo di financiamiento di e sector colectivo ta suma na AWG 297 miyon of 3.9% di e GDP miyon despues di e di dos kwartaal, locual nan ta señala hopi mas halto cu e norma di 1% di GDP y e 2.6% cu ta sigui for di e NJN.

E Consejo ta destaca cu aunke e beneficiarios di tereno den NJN a aumenta caba, nan ta anticipa surplusnan mas halto pa fin di 2024 na e Seguro General Medico (AZV) y na Banco di Seguro Social (SVb), principalmente debi na mas entradanan di prima y entradanan di impuesto riba omzet di negoshi (BBO) na frontera.

CAft ta indica cu esaki ta enfatisa e importancia di finalisa

e tumamento di decision riba con e surplusnan di AZV y SVb ta ser usa pa pago di debe y ta remarca cu despliegue di e surplusnan pa 2023 lo resulta den un reduccion di debe di AWG 100 miyon.

Pa loke ta trata e proporcion di debe, CAft ta resalta cu pa prome biaha desde e implementacion di e LAft modifica, e UR ta presenta e relacion di debe di e sector colectivo. Esaki ta nifica, e Consejo a splica, cu ta tuma accion di acuerdo cu e LAft y ta duna substancia na e consejo anterior di CAft. Nan ta conseha mas diferenciacion pa pais y otro entidadnan ser inclui den e UR.

CAft ta indica cu debi na surplusnan substancial, e proporcion di debe ta hopi bou di trayecto di reduccion di e proporcion di debe cu ta conduci na e norma di debe di 50% di GDP na 2040.

Nan ta señala cu e debe di e sector colectivo ta suma AWG 5.480 miyon despues di e di dos kwartaal of 72% di GDP. Esaki lo resulta den un debt ratio di 70% di GDP caba e año aki.

Pa loke ta trata e gastonan di personal, CAft ta indica cu e gastonan di personal lo suma na 4.0% di GDP despues di e di dos kwartaal. Ta premira cu Aruba lo haci esaki e año aki, a pesar di e aumento di gastonan di salario pa motibo di indexering, y lo cay bou di e plafond di 10% di GDP. Con e gastonan di personal ta desaroya te cu 2027 (ora e

plafond ta aplica) e Consejo ta menciona no ta cla ainda.

Pa haya un miho bista di e desaroyo di gastonan di personal, CAft ta indica ta necesario un bista general di e desaroyo di varios año ta necesario.

CAft ta sigui splica cu e gastonan di interes persistentemente halto di 17% di e presupuesto ta limita e flexibilidad di e presupuesto nacional. Nan ta resalta cu e desaroyo mas leu di gastonan di interes ta altamente dependiente di e tasa di interes (Mericano) y e resultado di e negociacionnan entre Hulanda y Aruba riba un cuadro di supervision nobo.

E Consejo ta destaca cu pagonan ta keda importante pa motibo di e gastonan halto di interes. Ademas, acuerdo riba un cuadro nobo di supervision den combinacion cu e uso di surplusnan na e otro entidadnan ta duna alivio substancial di interes (mas o menos AWG 100 miyon di spaar pa año pa 2029).

CAft ta remarca cu despues di e prome seis lunanan solamente 5% di e presupuesto di inversion a ser usa pa inversionnan. E causa ta un escasez di capacidad den sector priva cu mester implementa e inversionnan y limita capacidad den servicio di gobierno.

P'esey CAft ta anticipa un sub-agotamento significativo di e presupuesto di inversion. CAft ta conseha pa traha un agenda di inversion di varios año. Esaki, nan ta subraya,

por yuda cu e uso efectivo y eficiente di recursonan di inversion.

Pa loke ta trata riesgonan presupuestario, CAft ta destaca cu un gran parti di e tareanan di Gobierno di Aruba ta ser ehecuta door di entidadnan cu ta na distancia di e gobierno nacional. Debi na e falta di cuentanan anual actual cerca un cantidad grandi di entidadnan gubernamental, no tin suficiente bista riba e saldo financiero di e entidadnan aki y e efectividad di nan servicicionan.

Esaki, CAft ta remarca, ta crea riesgonan pa presupuesto di pais Aruba y ta haci e supervision di parti di Parlamento mas dificil. Ademas, nan ta agrega no ta cla con Aruba ta prepara pa retonan grandi manera enbehecimento, cambio di clima y transicion di energia. E Consejo ta destaca cu ta importante pa Aruba tin identifica riesgonan presupuestario aki y ta aclaria con e riesgonan aki ta ser atendi. E instrumento desaroya door di IMF por a ser usa pa esaki.

CAft ta destaca cu e maneho financiero no ta na ordo ainda. Nan ta indica cu e UR ta ser entrega laat structuralmente for di 2021 y e cuentanan anual adopta mas recientemente ta di 2018. Nan ta resalta cu un entrega na tempo di e rapportnan aki y adopcion di e cuentanan anual ta fortifica e bista di e Estadonan riba e bienestar financiero y economico di e pais. Esaki, e Consejo ta enfatisa ta di importancia pa eheericio di e derechonan presupuestario di Parlamento.

Por ultimo nan ta subraya cu den e contexto di esaki Landspakket Aruba ta trahando pa mehora e maneho financiero. CAft ta mira e desaroyo aki cu confiansa u ta enfatisa e importancia di proteccion sostenibel di resultadonan.

